



REPÚBLICA DEMOCRÁTICA DE TIMOR-LESTE
SECRETARIA DE ESTADO PARA A PROMOÇÃO DA IGUALDADE
GABINETE DA SECRETÁRIA DE ESTADO

Komemorasaun Aniversáriu Komisaun Funksaun Públika Bá Dala-Tolu (3)

Feto No Funksaun Públika: Papel no Dezafiu

Sentru Konvensaun Díli

17 Jullu

*Diskursu S.E. Sra. Idelta Maria Rodrigues Representa S.E. Sr. Kay Rala Xanana
Gusmão, Primeiru Ministru - RDTL*

S.E. Senhor Abilio Lima, Sekretáriu Estadu Meiu Ambiente

S. E. Representante Sekretariu Espesiál ONU iha Timor-Leste

Exmo. Presidente no Komisária Komisaun Funksaun Públika Tomak

Korpu Diplomátiku, Ajénsia Nasionál no Internasionál

Exmo. Diretór Jerál, Diretór Nasionál no Xefe Departamentu sira hotu

Exmo. Revendísimu Amu Agostinho Sampaio

Exma. Sra. Sri Hadiati WK, Adjunta Avaliasaun Dezempeñu Instituisaun Públika no

Servisu Estadu, Indonézia

Komandante PNTL

Ilustres Konvidadus

Senhoras no Senhores

Dader kmanek bá ita hotu!

Ho naran IV Governu Konstitusionál, iha oportunidade ida ne'e, hau hakarak atu hato'o lia menon iha okaziaun Komemorasaun Aniversáriu Komisaun Funsau Públika bá Dala-Tolu.

Uluk nanain, hau hakarak fó apresiasaun bá Funsau Públika tanba fó atensaun bá asuntu jéneru iha komemorasaun Aniversáriu Komisaun Funsau Públika nian bá dala tolu. Ida ne'e hatudu ona sinal pozitivu katak Funsau Públika tau ona atensaun a'as relasiona ho asuntu igualdade jéneru.

Ita nia konstituisaun garante direitu bá fetu sira atu partisipa iha moris ka iha vida polítika.

Iha konstituisaun RDTL hatete klaru iha artigu 16 katak sidadaun hotu - hotu iha lei nia oin, **HANESAN**, no mós iha direitu no obrigasaun hanesan. Alénde ne'e mós iha artigu 17 garante katak fetu no mane iha direitu no obrigasaun hanesan iha moris família, kultura, sosiál, polítika no ekonomia. Tamba ne'e konstituisaun fó garantia bá sidadaun hotu-hotu liu-liu fetu iha Timor-Leste atu hatene katak fetu sira mós iha direitu hanesan ho mane.

Atu fortifika promosaun igualdade jéneru iha progresu bá dezvoltamentu nasional tuir konstituisaun ne'ebé sai hanesan baze fundamentál ida hodi garante justisa bá jéneru no bele promove abordajen intregada jéneru.

Waihira ita liga ho Konvensaun atu Halakon Forma Oin-Oin Deskriminasaun Hotu Kontra Fetu (CEDAW) iha Artigu 11 kona-ba empregu ita bele hare'e katak:

1. Direitu atu hetan servisu nudar ema moris nia direitu.
2. Direitu atu hetan oportunidade empregu ne'ebé hanesan; nune'e mós hetan kritéria selesaun iha empregu hanesan.
3. Direitu atu hetan promosaun. Hetan garantia bá servisu no benefísiu hotu no mós kondisaun servisu no direitu atu simu formasaun no hetan formasaun vokasionál.
4. Direitu atu hetan saláriu hanesan; nune'e mós benefísiu no tratamentu ne'ebé hanesan kona-ba valór servisu hanesan; nune'e mós igualdade tratamentu hanesan iha avaliaun kualidade servisu nian.
5. Direitu bá seguransa sosiál, liu-liu wainhira hetan ona reforma, dezempregadu, moras, deficiente no wainhira atinje ona idade ferik-katuas ka sofre inkapasidade atu halao servisu no mós direitu atu hetan pagamentu bá lisensa sira.
6. Direitu atu hetan protesaun bá saúde no kondisaun servisu ne'ebé seguru nune'e mós proteje funsaun reproducaun.

Wainhira Komite CEDAW halo avaliaun bá Timor-Leste bazeia bá Relatóriu Estadu, uluk nanain, Komite fó Observasaun no Konkluzaun CEDAW kona-ba Empregu. Komite tau sira nia spreokupasaun kona-ba deskriminasaun iha empregu, kontratu,

saláriu, segregasaun servisu, númeru dezempregu ne'ebé aas no laiha servisu ne'ebé seguru bá fetu sira.

Komite CEDAW hato rekomendasaun: Adopta konvensaun ILO 111 kona-ba labele halo deskriminasaun iha empregu no ILO 100 kona-bá saláriu ne'ebé hanesan; asegura no monitoriza konformidade ho legislasaun, partikularmente benefísiu maternidade no halo monitorizasaun no regulamentu ne'ebé efektivu bá asuntu no prátika empregu.

Ita nia Lei Traballu foin mak aprova husi Parlamentu Nasionál iha loron 20 Dezembru 2011 no foin hahú válidu iha loron 20 Juñu 2012. Artigu 6 husi lei refere asegura prinsípiu igualdade, bandu deskriminasaun bazeia bá jéneru, no asegura igualdade entre mane no fetu kona-ba asesu bá empregu, kondisaun servisu no saláriu hanesan. Artigu 58 to'o 65 kobre lisensa maternidade no paternidade, lisensa bá *ante-natal*, no oportunidade inan-aman tau matan labarik iha situasaun emerjénsia.

Tuir dadus husi Funsau Públika iha tinan 2011, número fetu ne'ebé envolve iha Funsau Públika kuaze 30%, maibé maioria konsentra iha nível administrasaun (37%). Iha nível jestaun hanesan Xefe no Diretóra, númeru fetu sei oituan. Somente 17% fetu ne'ebé sai Xefe no 15% mak sai Diretóra. Ministériu ka Sekretaria Estadu ho númeru diretóra ne'ebé a'as liu mak:

1. Ministériu Turizmu, Komérsiu no Indústria
2. Sekretariu Estadu Seguransa
3. Sekretariu Estadu Rekursus Naturais

Ministériu ka Sekretaria Estadu ho númeru diretóra ne'ebé ki'ik liu mak:

1. Ministériu Edukasaun
2. Ministériu Infra-Estrutura
3. Sekretariu Estadu Juventude no Desportu

Tuir mai Ministériu ka Sekretaria Estadu ho númeru Xefe fetu ne'ebé a'as liu mak:

1. Ministériu Infra-Estrutura
2. Ministériu Negósiu Estranjeiru
3. Ministériu Turizmu, Komérsiu no Indústria
4. Sekretariu Estadu Rekursus Naturais
5. Sekretariu Estadu Promosaun Igualdade

Ministériu ka Sekretaria Estadu ho númeru Xefe fetu ne'ebé ki'ik liu mak:

1. Ministériu Solidariedade Sosiál
2. Ministériu Agrikultura no Peska
3. Sekretariu Estadu Formasaun Profisional no Empregu
4. Sekretariu Estadu Juventude Desportu
5. Sekretariu Estadu Defeza
6. Ministériu Saúde

Ita espera katak iha futuru estatística disponível husi Funsau Públika sei rigozoso liu tan duké agora.

Haktuir Survei Forsa Laborál 2010 fó-sai katak alénde iha servisu ne'ebé kualifikadu hanesan jerente ka funsionáriu, iha mós disparidade ne'ebe bo'ot.

Bá feto sira atu bele hetan servisu ho nível jerente, 75% husi sira presiza kompleta eskola sekundária, técnica ka vokasionál no bá mane sira somente 42% deit. Husi dadus hirak ne'e ita bele hare'e katak iha deskriminasaun iha rekrutamentu ne'ebé mak lao hela no feto sira tenke iha edukasaun ida ne'ebé diak liu mane sira para bele hetan servisu ne'ebé hanesan. Iha domíniu siénsia no teknolojia hatudu diskriminasaun ne'ebé ki'ik.

Hau espera katak iha Funsau Públika sei hadiak liu tan kritéria rekrutamentu entre feto no mane hodi asegura katak laiha obstakulu bá feto sira atu asesu bá iha kareira iha funsau públika ne'ebé a'as tebes no rekrutamentu hirak ne'e sei transparente tebes.

Atu asegura igualdade jéneru iha Funsau Públika, Sekretariu Estadu Promosaun Igualdade servisu ho INAP (ho fundus husi Irish Aid) atu inklui konseitu jéneru no CEDAW iha kuríkulu formasaun indusaun bá funsionariu públiku foun sira.

Importante liu, iha loraon kmanek wain ida ne'e, hau hakarak koalio kona-ba Rezolusaun No. 27/2011 relasiona ho Mekanizmu Grupu Traballu Jéneru iha Ministériu no Sekretaria Estadu hotu-hotu iha nível nasional no distritál adopta iha fulan Agustu 2011. Iha tinan 2012, GTJ establese ona iha Ministériu no Sekretariu Estadu 17 no iha distritu 13. GTJ Nasional lidera husi Diretór-Jerál sira ho membru sira mai husi nível Diretór para asegura tomada desizaun relasiona ho asuntu jéneru.

SEPI ho apoiu husi Irish Aid no UN Women halo tiha ona treinamentu atu socializa Rezolusaun GTJ no iha área Orsamentu Sensível bá Jéneru hodi hasa'e koñesimentu kona-ba papel no responsabilidade GTJ sira hodi garantia kompromisu polítika iha programa, lejislasaun no prioridade orsamentu ne'ebé efetivu no efisiente hodi responde bá nesesidade feto no mane iha Timor-Leste laran tomak.

Kuartu Governu Konstitusionál Repúblika Demokrátika Timor-Leste espera katak funsau públika bele servisu diak liu tan kompara ho tinan sira uluk liu bá hodi tau interese povu no nasaun Timor-Leste nudar prioridade.

Ikus liu hau nia parabens bá Presidente Komisaun Funsau Públika ho nia komisáriu no komisária sira, funsionáriu públiku hotu bá imi nia kontribuisaun ne'ebé ita bo'ot sira fó ona bá estadu. Husu imi nia disiplina, kontinua hatudu prestasaun servisu ho integridade no profesionalizmu atu nune'e bele dezenvolve rai doben Timor-Leste bá oin ho qualidade, transparénsia no akuntabilidade.

Hau orgullu tebes rona intervensaun husi representante husi instituisaun oin-oin hodi luta bá halakon diskriminasaun no violénsia ne'ebé feto sira hasoru iha rai doben ne'ebé ita hotu hadomi.

Obrigada